

## **Prvo savjetovanje o reformi visokog obrazovanja i implementaciji Bolonjskog procesa na Univerzitetu u Travniku**

„Prvo savjetovanje o reformi visokog obrazovanja i implementaciji Bolonjskog procesa na Univerzitetu u Travniku“ svečano je otvoreno u četvrtak, 27. 1. 2011. u amfiteatru Edukacijskog fakulteta. Cilj Savjetovanja bio je da se predstave smjernice i kriteriji koje Univerzitet u Travniku treba da ispuni kako bi stekao uslove za akreditaciju.

Radni dio Savjetovanja pozdravnim govorom i uvodnim referatom otvorio je rektor Univerziteta prof. dr. Rasim Dacić. Govoreći o spremnosti Univeziteta u Travniku za ispunjenje kriterija za akreditaciju, rektor Dacić je potvrdio trajnu opredjeljenost Univerziteta za reforme u visokom obrazovanju i iznio podatke koji govore u prilog tome da je Univerzitet u Travniku vrlo blizu ispunjenja svih kriterija koje je postavila Agencija za razvoj visokog obrazovanja i osiguranje kvaliteta Bosne i Hercegovine.

Gospođa Refija Kulašin, glavna kantonalna inspektorica Ministarsva obrazovanja, nauke, kulture i sporta Srednjobosanskog kantona, govorila je o zakonskoj regulativi u oblasti visokog obrazovanja na području Kantona, te naglasila da je Univerzitet u Travniku registriran u resornom kantonalnom Ministarstvu i sudskom registru te da ima puni legalitet i legitimitet.

Gospođa Aida Savić, predstavnica Agencije za razvoj visokog obrazovanja i osiguranje kvaliteta Bosne i Hercegovine, govorila je o procesu implementacije Bolonjskog procesa u svim segmentima visokog obrazovanja, te ukazala na značaj koji visokoškolske ustanove trebaju posvetiti kvaliteti nastavnog procesa, nastavnog kadra, radnog i učilišnog prostora i naučnoistraživačkog rada.

Doc. dr. Dobromir Bonacin, prorektor za naučnoistraživački rad Univerziteta u Travniku, u izlaganju na temu naučnoistraživačkog rada i značaju serijskih publikacija za Univerzitet u Travniku prezentirao je dva časopisa koja izdaje Univerzitet. Međunarodni znanstveni časopis iz područja kineziologije *Sport science* i časopis *Univerzitetska hronika* indeksirani su i dostupni u svjetskim bazama podataka. „Činjenica da smo, evo, i na ovaj način istupili prema Evropi i svijetu govori o ozbiljnosti u pristupu naučnoistraživačkom radu na Univerzitetu u Travniku. Sve dok nismo napravili korak više i pristupili svjetskim bazama znanstvenih podataka stvarali smo na lokalnom nivou i bili podložni kritikama manjeg broja ljudi. Sada, pak, kad smo svojim znanstvenim angažmanom prisutni u međunarodnom znanstvenom prostoru, gdje se granice istraživanja i dostignuća pomjeraju svakog trena, znatno odgovornije pristupamo ovom obliku intelektualne aktivnosti.“

Haris Hasić, predsjednik Unije studenata Univerziteta u Travniku, govorio je o prednostima studiranja na Univerzitetu u Travniku i angažmanu akademskog i administrativnog osoblja na ispunjenju svih potreba studenta, posebno ističući pozitivan i partnerski odnos nastavnika i studenata.

Prvom savjetovanju o reformi visokog obrazovanja i implementaciji Bolonjskog procesa na Univerzitetu u Travniku, pored spomenutih učesnika prisustvovali su prorektori Univerziteta, dekani organizacionih jedinica, nastavnici i asistenti, predstavnici studenata, predstavnici Vlade Srednjobosanskog kantona i Ministarstva obrazovanja, nauke, kulture i sporta,

predstavnicima Agencije za razvoj visokog obrazovanja i osiguranje kvaliteta BiH te predstavnicima Općine Travnik.

Prema programu Savjetovanja prezentirani su sljedeći referati:

- Prof. dr. Rasim Dadić: *Spremnost Univerziteta u Travniku za ispunjenje kriterija za akreditaciju;*
- Refija Kulašin: *Zakonska regulativa u oblasti visokog obrazovanja na području Srednjobosanskog kantona;*
- Aida Savić: *Proces implementacije Bolonjskog procesa u svim segmentima visokog obrazovanja;*
- Doc. dr. Dobromir Bonacin: *Naučnoistraživački rad i značaj serijskih publikacija za Univerzitet u Travniku;*
- Haris Hasić: *Prednosti studiranja na Univerzitetu u Travniku.*